

# INGOMA YAZO IINGOMA

1

2

3

4

5

6

7

8

## ISAHLUKO 1

**I**ngoma yazo iingoma, eyekaSolomon.

<sup>2</sup> Makandange ngokwanga komlomo wakhe; Ngokuba izincokoliso zakho zimnandi ngaphezu kwewayini.

<sup>3</sup> Amafutha akho anevumba elimnandi; Liyioli ethululwayo igama lakho; Ngenxa yoko iintombi ziyakuthanda.

<sup>4</sup> Nditsale, sogidima emva kwakho; Ukuba ukumkani undingenise ezingontsini zakhe, Sogcoba, sivuye ngawe. Sozikhankanya izincokoliso zakho ngaphezu kwewayini; Zikuthanda zinyanisile.

<sup>5</sup> Ndimnyama, ndinomkhitha noko, Zintombi zaseYerusalem, Njengeentente zakwaKedare, Njengamalengalenga kaSolomon.

<sup>6</sup> Musani ukundikhangela ngakuba ndife mnyama, Ngakuba nditshe lilanga. Oonyana bakama bandivuthela ngomsindo, Bandenza umlindi wezidiliya; Ke esisesam isidiliya andisilindanga.

<sup>7</sup> Khawundixilele, wena uthandwa ngumphefumlo wam, Walusela phi na? Uyibuthisa phi na imihlambi emini enkulu? Ngokuba kungani na ukuba ndibe njengogqubutheleyo Ngasemihlambini yamakholwane akho?

<sup>8</sup> Ukuba akwazi, nzwakazindini phakathi kweentokazi, Phuma, uhambe ngemikhondo yomhlambi, Uwaluse amatakane akho ngaseminqubeni yabalusi.

<sup>9</sup> Ndikufanekise, wethu, Nehashe kwaweenqwelo zikaFaro!

<sup>10</sup> Zinomkhitha izidlele zakho ziingcaca, Umqala wakho zizidanga.

<sup>11</sup> Sokwenzela iingcaca zegolide Ezinamaqhula esilivere.

<sup>12</sup> Xa ukumkani asesetafileni yakhe, Inadusi yam isuka ilikhuphe ivumba layo.

<sup>13</sup> Sisiqhuma semore intanda yam kum, Esihleli phakathi kwamabele am.

<sup>14</sup> Sisihloko sekoferi intanda yam kum Ezidiliyeni zase-Engedi.

<sup>15</sup> Yabona, uyinzwakazi, wethu! Yabona, uyinzwakazi! Amehlo akho anjengawamavukuthu.

<sup>16</sup> Yabona, uyinzwakazi, ntanda yam; ewe, umnandi; Umandlalo wethu uluhlaza.

<sup>17</sup> Imiqadi yendlu yethu yimisedare, lipanele zethu yimisipres.

## ISAHLUKO 2

**N**dingumfiyo waseSharon, Ndiyinyibiba yasezintlangeni.

<sup>2</sup> Njengenyibiba phakathi kweminga, Unjalo uwethu phakathi kweentombi.

<sup>3</sup> Njengomapile phakathi kwemithi yehlathi, Injalo intanda yam phakathi koonyana. Ndanqwena, ndahlala phantsi emthunzini wawo, Nesiqhamo sawo sanencasa ekhuhlangubeni lam.

<sup>4</sup> Indingenise endlwini yewayini, Nebhanile yayo phezu kwam luthando.

<sup>5</sup> Ndixhaseni ngezicumba zeerasintyisi, Ndisekeleni ngeepile; ngokuba ndisifa luthando.

<sup>6</sup> Isandla sayo sokhohlo siphantsi kwentloko yam; Esokunene siyandiwo.

<sup>7</sup> Zintombi zaseYerusalem, ndinifungisa Amabhadikazi namaxhamakazi asendle, Ukuba ningaluvusi, ukuba ningaluvuseleli uthando, Lude luthande.

<sup>8</sup> Phulaphulani! Intanda yam, nantso isiza, Itsiba ezintabeni, isuka imitsi ezindulini.

<sup>9</sup> Intanda yam ifana nebhadi, nenkonyana yexhama. Nantso imi emva kodonga lwakokwethu, lthe nzo ngeefestile, Inyondla ngekroba.

<sup>10</sup> Intanda yam yasusela, yathi kum, Suk' ume, wethu, nzwakazi yam, uze;

<sup>11</sup> Ngokuba uyabona, ubusika budlule, Imvula igqithile yemka;

<sup>12</sup> Iintyantyambo zibonakele ezweni; Ixesha lokuntyiloza kweentaka lifikile; Izwi lehobe ivakele ezweni lethu;

<sup>13</sup> Umkhiwane ukrwala amakhiwane awo, Imidiliya ityatyambile, Itshe ngevumba elimnandi. Suk' ume, wethu, nzwakazi yam, uze.

<sup>14</sup> Vukuthu lam elisemxawukeni wengxondorha, entsithelweni yemiba, Ndibonise ubuso bakho, ndivise ilizwi lakho; Ngokuba izwi lakho limnandi, ubuso bakho bunomkhitha.

<sup>15</sup> Sibambeleni iimpungutye, iimpungutye ezincinane ezonakalisa izidiliya; Izidiliya zethu zityatyambile.

<sup>16</sup> Intanda yam yeyam, mna ke ndingowayo Yalusela ezinyibibeni.

<sup>17</sup> Ide iphole imini, oluke amathunzi, Jika, ntanda yam, uxlise ibhadi, uxlise inkonyana yexhama, Ezintabeni ezibugqagala.

### ISAHLUKO 3

**E**sililini sam ebusuku ndamfuna lowo uthandwa ngumphefumlo wam; Ndamfuna andamfumana.

<sup>2</sup> Ndathi, Ndokha ndivuke, ndijikajike phakathi komzi, Ezindaweni zembutho nasezitrateni; Ndiya kumfuna lowo uthandwa ngumphefumlo wam. Ndamfuna andamfumana.

<sup>3</sup> Abalindi abajikajika phakathi komzi bandifumana; Ndathi kubo, Khe nambona na lowo uthandwa ngumphefumlo wam?

<sup>4</sup> Ndithe ndisandula ukudlula kancinane kubo, Ndamlumana lowo uthandwayo ngumphefumlo wam; Ndambamba, andamyeka, Ndada ndamzisa endlwini kama, Engontsini yowandikhawulayo.

<sup>5</sup> Zintombi zaseYerusalem, ndinifungisa Amabhadikazi namaxhamakazi asendle, Ukuba ningaluvusi, ukuba ningaluvuseleli uthando, Lude luthande.

<sup>6</sup> Ngubani na lo, unyuka evela entlango njengemiqule yomsi, Eqhunyelwa ngemore nentlaka emhlophe, lthatyathwe emigutyeni yonke yomrhwebi?

<sup>7</sup> Yabona, sisingqengqelo sikaSolomon, Siphahlwe ngamagorha angamashumi amathandathu Kumagorha akwaSirayeli.

- <sup>8</sup> Onke aphephe amakrele, afundiswe ukulwa, Lilelo linekrele ethangeni lalo Ngenxa yokoyika ebusuku.
- <sup>9</sup> Ukumkani uSolomon uzenzele ithala Ngemithi yaseLebhanon.
- <sup>10</sup> Iintsika zalo uzenze ngesilivere, Isayamo salo ngegolide, umqamelo walo ngento emfusa, Umphakathi walo ubekelelwe ngothando, Luvela ezintombini zaseYerusalem.
- <sup>11</sup> Phumani, zintombi zaseZiyon, nimkhangele ukumkani uSolomon, Enesithsaba, awasinxitywa ngunina ngemini yokuzeka kwakhe, Nangemini yokuvuya kwentliziyo yakhe.

## ISAHLUKO 4

**Y**abona, uyinzwakazi, wethu; yabona, uyinzwakazi. Amehlo akho anjengawamavukuthu ngaphaya kwesigqubuthelo sakho; linwele zakho zinjengomhlambi weebhokhwe Osemathambekeni eentaba zaseGiliyadi.

<sup>2</sup> Amazinyo akho anjengomhlambi weegusha ezichetyiweyo, Ezinyukayo zivela ekuhlanjweni, Zinamawele zonke, Kungekho ifelweyo kuzo.

<sup>3</sup> Unjengosinga olubomvu umlomo wakho; Ukuthetha kwakho kumnandi. Zinjengothanda lwerharnate iintlafuno zakho Ngaphaya kwesigqubuthelo sakho.

<sup>4</sup> Intamo yakho injengenqaba kaDavide, eyakhiwe ngokweendidi, Ekuxhonywe kuyo iwaka leengweletshetshe, Onke amakhaka amagorha.

<sup>5</sup> Amabele akho omabini anjengamankonyana amabini angamawele ebhadi, Esidla phakathi kweenyibiba.

<sup>6</sup> Ide iphole imini, oluke amathunzi, Ndiya kuhamba ndiye entabeni yemore, Nasendulini yentlaka emhlophe.

<sup>7</sup> Uyinzwakazi kwaphela, wethu; Akukho siphako kuwe.

<sup>8</sup> Yiza sihle eLebhanon, mtshakazi, Yiza sihle eLebhanon; Ufike ubonisele encotsheni yeAmana, Encotsheni yeSenire neHermon, Ezikhundleni zeengonyama, ezintabeni zezingwe.

<sup>9</sup> Uyingxwelerhile intliziyo yam, dade wethu, mtshakazi; Uyingxwelerhile intliziyo yam ngomjezulo omnye, Ngamrhukane mnye wesambalo sakho.

<sup>10</sup> Azi kuhle ukuncokolisa kwakho, dade wethu mtshakazi! Azi kumnandi ukuncokolisa kwakho ngaphezu kwewayini, Nevumba lamafutha akho ngaphezu kobulawu buphelele!

<sup>11</sup> Umlomo wakho uvuza incindi, mtshakazi; Bubusi namasi ngaphantsi kolwimi lwakho. Ivumba leengubo zakho linjengevumba leLebhanon.

<sup>12</sup> Ngumyezo obiyelweyo udade wethu, umtshakazi; Ngumgogogo ovaliweyo, liliso lomthombo elitywiniweyo.

<sup>13</sup> Amahlumelo akho ngumyezo wemirharnate, kunye neziqhamo ezimnandi kakhulu, Ikofere kunye nenadusi;

<sup>14</sup> Inadusi nesafron, Ikalamo nesinamon, kunye nemithi yonke yentlaka emhlophe, Imore nehaloti, kunye nobulawu bonke obuyintloko.

<sup>15</sup> Uliliso lomthombo lasemiyezweni, Iqula lamanzi aphilileyo, Nemiukuqela yamanzi yaseLebhanon.

<sup>16</sup> Vuka, moya wasentla, uze nawe wasezantsi: Phephezela emyezweni wam, buqukuqele ubulawu bawo. Mayingene intanda yam emyezweni wayo, Idle isiqhamo esimnandi kakhulu.

## ISAHLUKO 5

**N**dingenile emyezweni wam, dade wethu, mtshakazi wam; Ndiyikhile imore yam kunye netyeleba lam; Ndiydilile intlango yam kunye nencindi yam; Ndiyisele iwayini yam kunye namasi am. Yidlani bethu, Selani nibe mnandi, zintanda.

<sup>2</sup> Ndilele, yona intliziyo yam iphaphamile. Yiva, nantso intanda yam inkqonkqoza, isithi, Ndivulele, dade wethu, vukuthu lam, ngqibeleli yam, Ngokuba intloko yam izele ngumbethe, Isihlwitha sam sizele ngamathontsi obusuku.

<sup>3</sup> Ndathi, Sendikhulule nengubo yam yangaphantsi; ndothini na ukubuya ndinxibe? Sendizihlambile iinyawo zam, ndothini na ukubuya ndizidyobhe?

<sup>4</sup> Intanda yam yasolula isandla sayo ngekroba; Kwasika esiswini ngenxa yayo.

<sup>5</sup> Ndavuka ndaya kuyivulela intanda yam, Nezandla zam zavuza imore; Neminwe yam, imore eyivuzelayo Esiphathweni sesitshixo.

<sup>6</sup> Ndayivulela mna intanda yam; Ke yona intanda yam ibijike yemka. Ndemkelwa ngumbilini yakuthetha; Ndayifuna, andayifumana; Ndayibiza, ayasabela.

<sup>7</sup> Bandifumana abalindi abajikajika phakathi komzi, Bandibetha, bandilimaza; Abalindi beendonga bandilulutha ingubo yam yokwaleka ekrelekrele.

<sup>8</sup> Ndiyanifungisa, zintombi zaseYerusalem, ukuba nithe nayifumana intanda yam, Into enoyixelela yona, nothi, ndiyafa luthando.

<sup>9</sup> Iyintoni na intanda yakho kunezinye iintanda, Wena nzwakazindini phakathi kweentokazi? Iyintoni na intanda yakho kunezinye, Ukuba wenjenje ukusifungisa?

<sup>10</sup> Intanda yam iqaqambile, iyingqombela, Iyeyongamileyo ngaphezu kwamawaka alishumi.

<sup>11</sup> Intloko yayo iyigolide engcwengiweyo, ecikizekileyo; Isihlwitha sayo siziinduli ngeenduli, simnyama njengehlungulu.

<sup>12</sup> Amehlo ayo anjengawamavukuthu, engasemifuleni yamanzi, Ezihlamba ngamasi, ehleli njengamatye afakwe kakuhle.

<sup>13</sup> Izidlele zayo zinjengemityino yetyeleba, njengeziganga zezityalo zokuqhola; Umlomo wayo unjengeenyibiba, uvuza imore ezivuzelayo.

<sup>14</sup> Izandla zayo ziintonga zegolide, zifakwe amatye aseTarshishe, Isibili sayo siluphondo lwendlovu, lukrwilwe ngesafire.

<sup>15</sup> Imilenze yayo ziintsika zemarmore emhlophe, zifakwe ezisekweni zegolide engcwengiweyo. Isithomo sayo sinjengeLebhanon, sisihle njengemisedare.

<sup>16</sup> Ikhuhlangubo layo linobumnandi; inqwenelekile yona iphela. Yiyo leyo intanda yam; nguyela lowo uwethu, Zintombi zaseYerusalem.

## ISAHLUKO 6

**I**ye phi na intanda yakho, Wena nzwakazindini phakathi kweentokazi? Ibheke ngaphi na intanda yakho, Ukuze sikufunise?

<sup>2</sup> Intanda yam ihle yaya emyezweni wayo, emityinweni yetyeleba, Ukuba yalusele emyezweni, ukuba ikhe iinyibiba.

<sup>3</sup> Mna ndingowentanda yam, nentanda yam yeyam yona; Yalusela ezinyibibeni.

<sup>4</sup> Uyinzwakazi, wethu, njengeTirtsa, Unomkhitha njengeYerusalem; Woyikeka njengemikhosi eneebhanile.

<sup>5</sup> Wasuse amehlo akho kum, Ngokuba andiqwelile. linwele zakho zinjengomhlambi weebhokhwe Ezisemathambekeni aseGiliyadi.

<sup>6</sup> Amazinyo akho anjengomhlambi weemazi zeegusha Ezinyukayo, zivela ekuhlanjweni,

Zonke zizele amawele, Kungekho ifelweyo kuzo.

<sup>7</sup> Zinjengothanda lwerharnate iintlafuno zakho, Ngaphaya kwesigqubuthelo sakho.

<sup>8</sup> Bangamashumi amathandathu ookumkanikazi, angamashumi asibhozo amashweshwe, Neentombi ezingenakubalwa.

<sup>9</sup> Mnye yena olivukuthu lam oyingqibeleli yam; Mnye yena kunina, Umnyulwa walowo wamzalayo. Zambona iintombi, zathi unoyolo, Bamdumisa ookumkanikazi namashweshwe.

<sup>10</sup> Ngubani na lo uthi gqi njengesifingo, Mhle njengenyanga, Unyulu njengelanga, Woyikeka njengemikhosi eneebhanile?

<sup>11</sup> Bendihle ndaya emyezweni weminoti, Ukuba ndikhangele uhlaza lwesihlambo, Ndikhangele ukuba umdiliya unamathupha na, Imirharnate ityatyambile na.

<sup>12</sup> Bendingazi ukuba umphefumlo wam undibeke Ezingqwelweni zabantu bam, zamanene.

<sup>13</sup> Buya, buya, mShulamikazi; Buya, buya, sikubone. Nibona ntoni na kumShulamikazi, Njengokungathi kukuqamba kwabaMahanayim?

## ISAHLUKO 7

**A**zi kuhle ukunyathela kwakho ngeembadada, ntombi yenene! Izimbo zamanqe akho zinjengezidanga, Umsebenzi wezandla zengcibi.

<sup>2</sup> Inkaba yakho sisidendeleko esiyinqila; Masingasweli iwayini ephithikeziweyo; Isisu sakho sisidimbilili sengqolowa, Sibiyelwe ngeenyibiba.

<sup>3</sup> Amabele akho omabini anjengamankonyana ebhadi, Amankonyana amabini ebhadi, angamawele.

<sup>4</sup> Intamo yakho injengenqaba yophondo lwendlovu; Amehlo akho ngamachibi aseHeshbhon, Ngasesangweni layo, inabantu abaninzi; Impumlo yakho injengenqaba yaseLebhanon Ebheke eDamasko.

<sup>5</sup> Intloko yakho phezu kwakho injengeKarmele, Ubuyakayaka bentloko yakho bunjengosinga olumfusa; Ukumkani ukhonkxwe ngeenjiko zabo.

<sup>6</sup> Azi umhle, azi umnandi, Luthando, eziyolweni!

<sup>7</sup> Iwonga lakho eli lifana nomthi wesundu; Amabele akho afana nezihloko zomdiliya.

<sup>8</sup> Ndathi, Ndiya kuminya emthini wesundu; Ndiya kubambelela emagqabini awo; Amabele akho makabe njengezihloko zomdiliya, Nevumba lempumlo yakho libe njengeeapile;

<sup>9</sup> Nekhuhlangubo lakho libe njengewayini le ilungileyo, Ihla kamnandi kwintanda yam, Ibanga ukuba uthethe umlomo wabaleleyo.

<sup>10</sup> Mna ndingowentanda yam, Kukum ukungxamela kwayo.

<sup>11</sup> Hamba, ntanda yam, siphume siye emaphandleni, Silale emizaneni.

<sup>12</sup> Masivuke kusasa, siye ezidiliyeni, Sibone ukuba umdiliya unamathupha na, iintyantyambo zawo zibhenqekile na, Imirharnate ityatyambile na. Ndokunika apho izincokoliso zam.

<sup>13</sup> Amathuma apha anevumba; Phezu kweminyango yethu ziziqhamo ngeziziqhamo ezimnandi kakhulu, ezitsha kwanezidala, Endiziqwebele wena, ntanda yam.

## ISAHLUKO 8

**A**kwaba ubunjengomnakwethu Obesanya amabele kama! Bendingathi, ndikufumene phandle, ndikwange, Bangandideli noko.

<sup>2</sup> Bendiya kukuqhuba, bendiya kukusa endlwini kama; Ubuya kundifundisa. Bendiya kukuseza iwayini eqholiweyo, Nencindi yomrharnate wam.

<sup>3</sup> Isandla sayo sokhohlo besiya kuba phantsi kwentloko yam, Esokunene sayo sindiwole.

<sup>4</sup> Zintombi zaseYerusalem, ndiyanifungisa, Ningathini na ukuluvusa, ningathini na ukuluvuselela uthando, Lude luthande?

<sup>5</sup> Ngubani na lo unyuka evela entlango, Esayama intanda yakhe? Ngaphantsi komapile lo ndakuvusa wena. Khona apha waba nenimba ngawe unyoko, Khona apha waba nenimba owakuzalayo.

<sup>6</sup> Ndibeke njengomsesane wokutywina entliziyweni yakho, njengomsesane wokutywina engalweni yakho. Ngokuba uthando lunjengokufa, ukuba nengcwangu, Ubukhwele bunjengelabafileyo, ukuba lukhuni: Amalangatye abo ngamalangatye omlilo, Ngamadangatye kaYehova.

<sup>7</sup> Amanzi amaninzi akanakulucima uthando; Imilambo ayinakuluntiywilisela. Ingafanelana indoda irhole bonke ubuncwane bendlu yayo ngenxa yothando, Ingadelwa ideliwe.

<sup>8</sup> Sinomsakwethu omncinane, Akakabi namabele. Siya kuthini na ngomsakwethu, Mini aganelweyo?

<sup>9</sup> Ukuba uludonga yena, Siya kwakha phezu kwalo uqoqo lwesilivere; Ukuba ungumnyango, Somrhaqa ngamaceba omsedare.

<sup>10</sup> Ndaba ludonga mna, namabele am anjengenqaba; Ndaza emehlweni ayo ndaba njengo fumene uxolo.

<sup>11</sup> USolomon ubenesidiliya eBhahali-amon, Isidiliya wasinikela kubagcini, Ukuze elowo azise iwaka lesilivere ngesiqhamo saso.

<sup>12</sup> Isidiliya sam, esisesam, sona siselulawulweni lwam; lwaka elo lelakho, Solomon; Amakhulu amabini ngawabagcini besiqhamo saso.

<sup>13</sup> Wena uhleliyo emiyezwani, Amakholwane alibazela indlebe izwi lakho, Ndivise.

<sup>14</sup> Dloba, ntanda yam, Uxelise ibhadi namankonyana amaxhama Ezintabeni zobulawu.

For other languages please go to **[www.wordproject.org](http://www.wordproject.org)**